

मार्निंग डोगरी न्यूज बुलेटिन, समें. 09.20 Hrs

<><><><><><>

### Headlines

- केंद्री गृह मंत्री अमित शाह होरें आखेआ ऐ जे पाकिस्तान दे नजैज कब्जे आला इलाका जम्मू-कश्मीर दा गै हिस्सा ऐ, इस करिए एहदे पर भारत दा गै हक्क बनदा ऐ।
- सीनियर बीजेपी नेता अमित शाह होर द'ऊं दिनें दे दौरें पर अज्ज संझा श्रीनगर पुज्जा'रदे न।
- उपराज्यपाल मनोज सिन्हा होरें मैहकमा माल दिएं ऑनलाइन सेवाएं गी पूरी चाल्ली तरतीव देने दा निर्देश जारी कीता ऐ।
- नेजा सुट्टने आले भारतीय एथलीट नीरज चोपडा नै फेडरेशन कप च सुन्ने दा तगमा जितेया ऐ।

<><><><><><>

### Amit Shah Interview

भारतीय जनता पार्टी दे वरिष्ठ नेता ते केंद्रीय मंत्री अमित शाह होरें फही आखेआ ऐ जे पाकिस्तान दे नजैज कब्जे आला जम्मू-कश्मीर भारत दा हिस्सा ऐ ते एहदे पर भारत दा हक्क ऐ। इक खबर एजेंसी गी दिते गेदे इंटरव्यु च उनें आखेआ जे पाकिस्तान दे नजैज कब्जे आला जम्मू-कश्मीर भारत दा ऐ की जे समूचे जम्मू-कश्मीर दा विलय भारत च कीता गेआ हा।

पाकिस्तान कब्जे आले जम्मू-कश्मीर च होआ रदे प्रदर्शनें बारै च शाह होरें आखेआ जे एह कुप्रबंधन करी ऐ। आम आदमी पार्टी प्रमुख हुंदे इस दावे जे पार्टी गी लोड़चदे वोट मिलने पर उनेंगी जेल जाने दी लोड़ नेई होग, इस पर गृह मंत्री होरें आखेआ जे उनेंगी लगदा ऐ जे एह सुप्रीम कोर्ट दी साफतौर पर अवमानना ऐ।

<><><><><><>

### Amit-Shah Srinagar

केंद्री गृह मंत्री ते बीजेपी दे सीनियर लीडर अमित शाह होर दऊं दिनें दे दौरै पर अज्ज संझा श्रीनगर पुज्जा करदे न। समाचार एजेंसी पी.टी.आई नै बीजेपी प्रवक्ता अल्ताफ ठाकुर हुंदे हवाले कन्नै खबर दिती ऐ जे अमित शाह होर रातीं श्रीनगर च गै रौहडन। दौरै दौरान उंदा केंद्र शासित प्रदेश दी मजूदा सुरक्षा स्थिति दा जायजा लैने दे कन्नोकन्नी केईं प्रतिनिधिमंडलें कन्नै मिलने दा बी कार्यक्रम ऐ। अमित शाह हुंदा एह दौरा मुल्खै च लोकसभा चुनाएं दे चलदे लग्गा रदा ऐ। श्रीनगर लोकसभा सीट लेई चौथे गेड़ तैहत 13 मई गी वोट पोआए गे हे जित्थे 1996 दे बाद अजें तगर सब्बनें शा मता कोई 38 प्रतिशत मतदान दर्ज कीता गोआ हा। बीजेपी नै कश्मीर घाटी दिएं त्रऊ लोकसभा सीटें लेई अपना कोई मेदवार चुनां मैदान च नेई तोआरे दा पर किश पार्टिं गी ओह समर्थन देआ करदी ऐ। घाटी दिएं बाकी रौहंदी दऊं सीटें बारामुला ते अनंतनाग राजौरी सीट पर बिल तरतीब 20 ते 25 मई गी वोट पाए जाने न।

<><><><><><>

## CAA

नागरिक संशोधन कनून 2024 दी अधिसूचना मगरा नागरिकता प्रमाण पत्रें दा पैहला सेट कल जारी कीता गोआ। केंद्री गृह सचिव अजय कुमार भलला होरें नमीं दिल्ली च किश आवेदकें गी नागरिकता प्रमाण पत्र सोंपे। सरकार नै नागरिकता संशोधन कनून तैहत 14 आवेदकें गी नागरिकता देने दा फैसला कीता ऐ। नियमें तैहत पाकिस्तान, बांगलादेश ते अफगानिस्तान थमां हिंदू, सिख, जैनल, बौद्ध, पारसी ते इसाई समुदायें दे लोकें कोला आवेदन हासल कीते गे जेडे 31 दिसंबर 2024 तगर भारत च दाखिल होई गेदे हे।

<><><><><><>

## IG-BSF

सीमा सुरक्षा बल बीएसएफ कश्मीर दे महानिरीक्षक अशोक यादव होरें कल कुपवाड़ा जिले च नियंत्रण रेखा कन्नै लगदे अगेत्रे इलाके दा दौरा कीता ते उत्थे तैनात बलें दिएं कार्रवाइएं सरबन्धी त्यारिएं दा जायजा लैता। आई.जी होरें कपुवाड़ा ते टंगधार च नियंत्रण रेखा कश मजूदा सुरक्षा स्थिति दा जायजा लैता। इस बारे जानकारी बीएसएफ नै अपनी इक सोशल मीडिया पोस्ट पर सांझी कीती ऐ। ध्यानजोग ऐ जे 20 मई गी बारामुला-कुपवाड़ा लोकसभा सीट लेई वोट पोआए जाने न।

<><><><><><>

## NIA

राष्ट्रीय जांच एजेंसी एनआईए नै पाकिस्तान ते पाकिस्तान दे नजैज कब्जे आले जम्मू-कश्मीर थमां ड्रोन राएं थेआर ते गोली-बरूद भारत च लश्करे-तैयबा आतंकी संगठन तगर पुजाने दे आरोप च इक होर आदमी दा नां अपने चार्जशीट च दाखल कीता ऐ। जाकि हुसैन उर्फ सोनू 10मां आरोपी ऐ जेदा नां 2022 च दर्ज मामले च शामिल कीता गेआ ऐ। एजेंसी नै दस्सेया ऐ जे सोनू दा नां जम्मू च इक विशेष अदालतै च दाखल दुई पूरक चार्जशीट च शामिल कीता गेआ ऐ। एनआईए नै 30 जुलाई 2022 गी एह मामला अपने हत्थै च लैता हा जेड़ा शुरूआती तौरा पर औदे शा इक रोज पैहले 29 मेई गी जम्मू प्रांतै दे कठुआ जिले च राजबाग पुलस आस्सेआ दर्ज कीता गेआ हा जदूं जिले दे ढल्ली इलाके च ड्रोन राएं बन्ने पारा पुजाए गेदा काफी सारा असलाह बरामद होआ हा।

<><><><><><>

## Maungri-Mela

सालाना शिव पार्वती मौंगरी मेले दे दुए ध्याड़े ज्हारां बद्दे यात्रुएं ते भक्तें मेले च जाइयै माता पार्वती ते भगवान शिव हुंदे अग्गे मत्था टेकेया। भक्तें दे मनोजरंजन लेई ते समाज दे बक्ख-बक्ख वर्गे च आपसी स्नेह ते समझदारी गी बढ़ावा देने लेई सूचना ते जनसंपर्क विभाग उधमपुर नै जम्मू-कश्मीर दी सूचना ते जनसंपर्क मैहकमे दी सांस्कृतिक सरबंधी सीगे कन्ने रलियै इक सांस्कृतिक कार्यक्रम दा सरिस्ता कीता।

जिला प्रशासन नै मेले दी असरदार तरीके कन्नै तोड़ चाढ़ने लेई सब्बै जरूरी प्रबंध करी लैते दे न जिंदे च पानी, बिजली, सेहत, सुरक्षा वगैरा शामिल न।

<><><><><><>

### Injured

जम्मू दे बाहरले इलाके अखनूर च कल शामी लै इक बस दे हादसे दा शकार होइए सड़कै पर परतोई जाने कारण घटोघट्ट एहदे च सवार घटोघट्ट 10 सोआरियां जख्मी होई गेइयां। पुलसै मुजब खौड़ थमां जम्मू जा'रदी ही जिसले बल्ले दे बाग कश एह परतोई गेई। हादसे दे तुरत मगरा पुलस ते मकामी लोक उत्थे पुज्जी गे ते बचाव कार्रवाई शुरू करी दिती। घायलें गी तुरत अस्पताल पुजाया गेआ जित्थे उंदी हालत स्थिर दस्सी जा रदी ऐ।

<><><><><><>

### LG-Revenue

उपराज्यपाल मनोज सिन्हा होरें व्यापक ते पारदर्शी तरीके राहें जिमी रिकार्ड प्रबंधन प्रणाली तैयार करने ते लोकें गी दिती जा रदी बक्ख-बक्ख सेवाएं दा बिजन कुसै रूकावट दे विस्तार यकीनी बनाने उप्पर जोर दिता। उनें राजस्व मैहकमे, डिविजनल कमिशनरें ते सबबनें डिब्बि कमिशनरें गी निर्देश दिता जे ओह जिमी दे इस्तेमाल च बदलाव, कनूनी वारिस प्रमाण पत्र, अनुसूचित जाति, जनजाति ते होरनें पिच्छड़े दे वर्ग दे प्रमाण पत्रें सरबन्धी आनलाइन सेवाएं गी सुचारू बनान। कल राजस्व मैहकमें दी समीक्षा बैठक दी अध्यक्षता करदे होई सिन्हा होरें आखेआ जे असरदार अमलावरी लेई जिमी सरबन्धी योजनाएं गी लागू करने, जिमी रिकार्ड लेई सोकखी पुज्ज ते सहूलत लेई बुनियादी ढांचे दा विकास ऐ।

उपराज्यपाल हुंदे सनें उंदे सलाहकार राजीव राय भटनागर, मुख सचिव अटल डुल्लू ते राजस्व मैहकमे दे होरनें सीनियर एहलकारें बी इस बैठक च हिस्सा लैता।

<><><><><><>

### LG-Water

जम्मू-कश्मीर च हुन 14 लक्ख 91 जहार ग्रामीण घरें च नलके राएं साफ पीने आला पानी पुज्जा करदा ऐ। एह जानकारी कल उपराज्यपाल मनोज सिन्हा हुंदी अध्यक्षता च लग्गी दी जल शक्ति मैहकमे दी इक जायजा बैठक च दिती गई। बैठक दौरान एलजी होरें मैहकमे दे अधिकारिं गी निर्देश दिता जे ओह जारी कम्में गी तौले ते मित्थे गेदे समें दे अंदर-अंदर तोड़ चाढ़ना यकीनी बनाने लेई कम्मै च तेजी आहनन तां जे बाकी रौहंदे घरें तगर बी नलके राएं पानी तौले पुज्जी सकै। एल.जी होरें गी जल जीवन मिशन तैहत हासिल उपलब्धिं दा जिलें स्हाबै ब्यौरा बी पेश कीता गेआ। मनोज सिन्हा होरें सोए दौरान पानी दी मंग गी पूरा करने लेई तैयार कार्ज योजना दा बी जायजा लैता।

<><><><><><>

### RDD

ग्रामीण विकास जम्मू दे निदेशक मोहम्मद मुमताज अली होरें विकास कम्में दी प्रगति दा जायजा लैने लेई कल सांबा, कठुआ ते जम्मू जिले दा दौरा लाया। उनें पंचैती राज मैहकमे ते ग्रामीण विकास सरबंधी बक्खउ-बक्ख परियोजनाएं तैहत जारी केइएं विकास कम्में दा निरीक्षण कीता।

दौरे दरान निदेशक होरें फील्ड अमले कन्नै गल्लबात कीती ते उनेंगी तयशुदा समें दे अंदर-अंदर कम्में गी सबूरा करने लेई आखेआ। उनें गुणवत्ता कायम रखदे होई उनेंगी पेशेवर तरीके कन्नै कम्म करने दे बी निर्देश दित्ते। तकनीकी अमले गी विकास कम्में दी अमलावरी पर नेइमी तक्क बनाए रखने लेई आखेआ गेआ ऐ।

<><><><><><>

### DC-Jammu

जम्मू दे डिप्टी कमिशनर सचिन कुमार वैश्य होरें मुतलका अधिकारियें गी निर्देश दित्ता ऐ जे प्रधानमंत्री किसान सम्मान निधि योजना तैहत जेहड़े अयोग्य लाभार्थियें इस योजना दा लाह ठोआंदे न, उंदी पंछान करने लेई परतियै तस्दीक कीती जा। मुतलका सब डिविजनल मैजिस्ट्रेट बागवानी सरबंधी अधिकारी ते तहसीलदारें गी 7 दिनें दे अंदर-अंदर इस योजना दे दिशा-निर्देशें तैहत तस्दीक दी प्रक्रिया पूरी करने लेई आखेआ ऐ। अफसरें गी जिमी सतह पर जाइयै सर्वे करने ते तफसीली जानकारी दर्ज कराने लेई निर्देश दित्ते गे न।

<><><><><><>

### DHS

जम्मू दे सेहत सेवाएं सरबंधी निदेशक डॉक्टर राकेश मगोत्रा होरें कल रामबन जिले च सेहत सेवाएं ते सेहत संस्थानें दा दौरा लाया ते कारकरदगी बारै व्यापक जायजा लैता।

इस मौके उनेंगी जानकारी दिती गई जे आयुष्मान भारत प्रधानमंत्री जन आरोग्य योजना तैहत जिले च 6 जहार 790 दावें दा नबेड़ा करदे होई 419 लक्ख रपे खर्च कीते गए। उनें एह बी दस्सेया जे बरे 2023-24 बरे च प्रधानमंत्री नेशनल डायलीसिस प्रोग्राम तैहत 919 डायलीसिस सैशन कीते गे न। एहदे अलावा जननी सुरक्षा योजना तैहत सरकारी सेहत इदारे च कुल 4 जहार 232 जचगी कीती गई ऐ ते पिछले बरे 10 जहार 24 सर्जरियां बी कीतियां गेइयां।

<><><><><><>

### Neeraj-Chopra

ओलंपिक चैंपियन नीरज चोपड़ा नै कल भुवनेश्वर च मर्दे दी नेजा सुट्टने आहली प्रतियोगिता फेडरेशन कप 2024 च सुन्ने दा तगमा जित्तेया ऐ। 26 बरें दी बरेसू दे चोपड़ा गी प्रतियोगिता दे शुरूआती दौर च जद्दोजहद करनी पेई ही कीजे त्रॉ रौंड दे पूरे होने मगरा ओह दुई थाहर पर हे। उनें चौथे राउंड च 82.27 मीटर दी दूरी पर नेजा सुट्टियै बढत बनाई लैती। नीरज चोपड़ा नै 2021 च देसै च आयोजित इस्सै प्रतियोगिता च हिस्सा लेइयै 87.80 मीटर दूर नेजा सुट्टियै सुन्ने दा तगमा जित्तेया हा। औदे मगरा उनें टोक्यो ओलंपिक च ऐतिहासिक सुन्ने दा तगमा जित्तेया ते 2022 च डायमंड लीग चैंपियनशिप दा खिताब अपने नां कीता। 2023 च चोपड़ा होर विश्व चैंपियन बने ते चीन च एशियाई खेड्डे च सुन्ने दा तगमा जित्तेया।

<><><><><><>